

Panggilan Tiga Malaikat untuk Berdoa

HARI 10 — UMAT TUHAN, YANG SISA DAN DOA

"Yang dituntut di sini ialah ketabahan orang salih yang mengikut perintah Allah serta beriman kepada Yesus." – Wahyu 14:12 (AVB)

Matlamat Akhir

Perkhabaran tiga malaikat mempunyai satu tujuan utama, satu fokus tunggal: untuk mempersiapkan suatu umat bagi kedatangan Yesus. Perkhabaran ilahi yang dilhamkan ini mencapai titik puncaknya dalam Wahyu 14:12, ketika Yohanes menjelaskan hasil akhir daripada pengertian dan penerimaan perkhabaran akhir zaman dari Syurga. Rasul itu menyatakan bahawa perkhabaran ini akan menghasilkan suatu umat seperti yang tertulis, "Yang dituntut di sini ialah ketabahan orang salih yang mengikut perintah Allah serta beriman kepada Yesus" (Wahyu 14:12).

Perkataan *ketabahan* boleh diterjemahkan lebih baik dengan *ketahanan*. Dengan limpah kurniaNya, umat Tuhan akan bertahan dengan kesengsaraan zaman akhir dan para penakluk. Mereka akan bersemuka dengan keberangan binatang itu dan tidak melepaskan kesungguhan keyakinan mereka. Walaupun mereka tidak dapat membeli atau menjual dan menghadapi penganiayaan, pemenjaraan dan kematian sekalipun demi Kristus, namun mereka menurut perintah-perintahNya. Mereka tidak dapat dipaksa untuk melepaskan kesetiaan mereka kepada Kristus. Mereka menghidupkan kehidupan yang dipenuhi dengan limpah kurnia, meninggalkan Kristus dan menurut di tengah-tengah dunia yang berdosa, memberontak dan tidak taat pada masa akhir Bumi.

Iman dari Yesus

Terdapat sesuatu lain yang menarik tentang Wahyu 14:12. Para umat percaya akhir zaman bukan sahaja memiliki iman *dalam* Yesus, malah mereka mempunyai iman *dari* Yesus atau iman Yesus. Apakah iman Yesus? Iman Yesus mempunyai kualiti yang sama dengan iman dalam Tuhan yang Yesus miliki di salib. Ketika Yesus tergantung pada salib menanggung kesalahan, keaiban dan hukuman atas dosa-dosa manusia, Dia merasakan diabaikan Tuhan. Kejahatan dosa itu begitu besar sehinggakan Yesus merasakan ditinggalkan Tuhan. Inilah sebabnya Dia berteriak dalam penderitaan, "Ya Allah-Ku, ya Allah-Ku, mengapa Kau tinggalkan Aku?" (Matius 27:46). Adakah Tuhan telah meninggalkan Dia? Sudah tentu tidak! Mata BapaNya sentiasa tertuju pada salib itu. Hatinya yang penuh kasih telah hancur disebabkan penderitaan yang AnakNya sedang lalui. Yesus percaya ketika Dia tidak dapat melihat. ImanNya melebihi daripada apa yang sedang berlaku di sekitarNya. Itulah sebabnya kata-kata terakhirNya adalah, "Ya Bapa, Aku menyerahkan roh-Ku ke dalam tangan-Mu" (Lukas 23:46).

Sejurus sebelum kedatangan Yesus kembali, menurut nubuatan-nubuatan Wahyu, umat Tuhan akan sekali lagi perlu untuk percaya ketika segala sesuatu di sekeliling mereka kelihatan menentang mereka. Apakah yang akan membawa mereka melalui masa pencobaan ini? Ianya adalah "iman Yesus." Bagaimanakah kita membangunkan iman Yesus ini? Pertama, sepertimana keselamatan merupakan satu pemberian, begitu juga iman adalah satu kurnia yang Tuhan tempatkan di dalam hati kita yang bertumbuh sementara kita amalkannya (Roma 12:3-8). Apabila kita mengalami keadaan-keadaan yang sukar dan nekad berpaut kepada janji-janji Tuhan, iman kita bertumbuh. Ketika kita penuhkan minda

kita dengan Firman Tuhan, iman kita bertumbuh (Roma 10:17). Apabila kita menyadari kekurangan iman kita dan berdoa dengan sungguh-sungguh untuk Tuhan meningkatkan iman kita, maka ia bertumbuh (Lukas 17:5).

Pada waktu kita berdoa hari ini, mari kita meminta Tuhan untuk memberikan kita ketahanan sementara kita bersemuka dengan pencobaan dan kesukaran hidup. Mari kita berdoa agar Dia akan memberikan kita kekuatan untuk menjadi penurut kepada kehendakNya di dalam setiap aspek kehidupan kita dan mari kita memohon Syurga untuk mengurniakan kita satu pertambahan iman supaya "iman Yesus" memenuhi kehidupan kita dan mempersiapkan kita untuk krisis terakhir Bumi. Kemudian, suatu hari nanti, kita akan hidup bersama Yesus buat selama-lamanya!

Waktu Berdoa (30-45 Minit)

Mendoakan Firman Allah – Wahyu 14:12

"Yang dituntut di sini ialah ketabahan orang salih yang mengikut perintah Allah serta beriman kepada Yesus."

"Yang Dituntut di Sini ialah Ketabahan Orang Salih"

Tuhan, kami telah menunggu lama kedatanganMu kembali. Kami juga mengetahui bahawa waktuMu tidak pernah tersasar dan Engkau mengetahui apa yang terbaik untuk kami. Terima kasih kerana sementara Roh Kudus tinggal di dalam kami, Dia akan menghasilkan kesabaran dan ketabahan pada kami. Tunjukkan kami bagaimana menggunakan dengan terbaik masa yang kami masih miliki untuk menghormati Engkau. Apabila kami berhadapan dengan ujian dan kesukaran, kami akan dihiburkan dengan mengetahui bahawa Engkau menyediakan kekuatan dan ketabahan ilahi.

"Yang Mengikut Perintah"

KehendakMu, Allah, adalah kasih. Kasih padaMu dan kasih bagi orang lain. Kasih seperti yang dinyatakan di dalam Firman Allah dan dalam kehidupan Yesus. Saya bersukacita dengan kenyataan bahawa Engkau mampu dan rela untuk mengubah hati kami yang memberontak kepada hati yang selaras dengan hukum agung kasih.

"Iman Yesus"

Saya kagum, Tuhan, dengan iman dan kesetiaan yang Yesus tunjukkan di bumi ini terutama sekali ketika mati di salib. Selagi kepercayaanNya pada Bapa merupakan satu teladan kepada kami, Dia tidak meninggalkannya di sana tetapi menyediakan bagi semua orang yang percaya kepada peluang-peluang untuk membangunkan kualiti iman yang sama itu. Yesus, matangkanlah iman kami lebih lagi setiap hari. Kami berserah kepadaMu, Juruselamat kami yang berharga dan setia.

Cadangan Lanjutan Doa

Kesyukuran dan Pujian: Berikan kesyukuran bagi berkat-berkat tertentu dan puji Tuhan kerana kebaikanNya.

Pengakuan: Ambil beberapa minit untuk pengakuan peribadi dan bersyukur kepada Tuhan kerana pengampunanNya.

Bimbingan: Minta Tuhan untuk menganugerahkan kebijaksanaan bagi menghadapi cabaran dan keputusan semasa.

Gereja Kita: Berdoa bagi keperluan-keperluan gereja di peringkat wilayah dan sedunia (lihat lembaran berasingan yang berkaitan dengan permintaan).

Permintaan Setempat: Berdoa bagi keperluan-keperluan para anggota gereja, keluarga dan jiran tetangga.

Mendengar dan Menyahut: Ambil masa untuk mendengar suara Tuhan dan menyahutnya dalam pujian atau lagu.

Cadangan Lagu

SDA Hymnal: Let All Things Now Living (#560); Whiter than Snow (#318)

LPMI: Sidang Mempunyai Dasar (#148); Rahmat Ajaib (#55); Bila Kita Ke Syurga (#185); Kerna Syurga Sudahlah Hampir (#95); Raja Kekal, Pimpinlah (#183); Puji Pada Tuhan (#138)